



UNIVERZITET U ZENICI

PRAVILNIK
O POSTUPKU I USLOVIMA ZA DODJELU POČASNOG ZVANJA
PROFESSOR EMERITUS
UNIVERZITETA U ZENICI

Zenica, februar 2014. godine

Na osnovu člana 53. stav (2) tačka b) Zakona o visokom obrazovanju (Sl. novine Zeničko-dobojskog kantona, broj 6/09 i 9/13), člana 19.a stav 2. alineja 3. Zakona o JU Univerzitet u Zenici (Službene novine Zeničko-dobojskog kantona, broj: 6/05, 11/06, 6/09, 10/11, 16/11 i 15/12) i člana 63. stav (2) tačka c) Statuta Univerziteta u Zenici (Prečišćeni tekst), a u vezi s odredbama članova 308., 309., 310. i 311. Statuta Univerziteta u Zenici (Prečišćeni tekst), na prijedlog Komisije za izradu pravilnika o postupku i uslovima za dodjelu počasnog zvanja *professor emeritus* Univerziteta u Zenici, Senat Univerziteta u Zenici, na 03. sjednici održanoj 26.02.2014. godine, donio je

PRAVILNIK

O POSTUPKU I USLOVIMA ZA DODJELU POČASNOG ZVANJA *PROFESSOR EMERITUS* UNIVERZITETA U ZENICI

Član 1.

(Sadržaj Pravilnika)

Ovim pravilnikom se bliže uređuju postupak i uslovi za dodjelu počasnog zvanja *professor emeritus*, kao i prava kandidata izabranih u ovo počasno zvanje na Univerzitetu u Zenici (u daljem tekstu: Univerzitet).

Član 2.

(Uslovi za dodjelu zvanja)

(1) Počasno zvanje *profesor emeritus* može se dodijeliti redovnom profesoru Univerziteta u penziji.

(2) Kandidat za dodjelu počasnog zvanja *professor emeritus* mora imati posebne zasluge za razvoj i napredak Univerziteta, te međunarodno priznate nastavne, naučne ili umjetničke rezultate.

(3) Posebni uslovi za dodjelu zvanja *professor emeritus* su:

a) uspješno provedeno vrijeme u nastavi, ne kraće od 10 godina, na visokoškolskoj ustanovi na kojoj je kandidat imao status zaposlenika u radnom odnosu;

b) period od najmanje 6 (šest) godina provedenih u zvanju redovnog profesora, tokom kojeg se posebno istakao svojim naučnim, odnosno umjetničkim radom u oblasti za koju je izabran;

c) naučni doprinos kojim je kandidat javno afirmisao svoju naučnu oblast, najmanje 4 (četiri) objavljene knjige od značaja za naučnu oblast kandidata, najmanje 20 (dvadeset) naučnih radova od značaja za naučnu oblast kandidata objavljenih u relevantnim publikacijama, od toga najmanje 2 (dva) naučna rada objavljena u indeksiranim časopisima, te najmanje 3 (tri) projekta od značaja za naučnu oblast kandidata;

d) umjetnički doprinos kojim je kandidat javno afirmisao svoju umjetničku oblast, javno predstavljeni oblici umjetničkog stvaralaštva koji su značajno doprinijeli razvoju kulture i umjetnosti;

e) uspješno realizovana mentorstva, i to najmanje po 3 (tri) mentorstva kandidatima za stepen drugog i trećeg ciklusa u oblasti u kojoj se kandidatu dodjeljuje počasno zvanje *professora emeritusa*.

Član 3. **(Prava kandidata izabranih u zvanje *professor emeritus*)**

(1) Prava kandidata izabranih u zvanje *professor emeritus* su:

- da učestvuje u izvođenju nastave na magistarskom i doktorskom studiju,
- da bude član komisije u postupku za izbor u akademsko/naučno zvanje,
- da bude član komisije u postupku prijave, odobrenja, izrade i odbrane magistarskog i doktorskog rada,
- da bude mentor kandidatu pri izradi magistarskog i doktorskog rada,
- da ima savjetodavnu ulogu na Univerzitetu, u skladu s potrebama Univerziteta.

(2) *Profesor emeritus* ima pravo da učestvuje i u naučnoistraživačkom, odnosno umjetničkoistraživačkom radu na Univerzitetu.

(3) Redovni profesor u penziji, kojem je Univerzitet dodijelio počasno zvanje *professor emeritus*, ima pravo koristiti pomenuto zvanje, kao titulu, ispred imena.

Član 4. **(Godišnja dodjela zvanja)**

(1) Univerzitet dodjeljuje godišnje najviše pet počasnih zvanja *professor emeritus*.

(2) Izvan kvote predviđene stavom (1) ovog člana počasno zvanje *professor emeritus* može biti dodijeljeno i redovnom profesoru u penziji, koji je obavljao funkciju rektora na Univerzitetu, uz ispunjenje uslova za dodjelu zvanja iz člana 2. ovog Pravilnika.

Član 5. **(Postupak za dodjelu počasnog zvanja *professor emeritus*)**

(1) Najmanje 2 (dva) NNV/UNV fakulteta/akademije, uz prethodnu pismenu saglasnost rektora, pokreću postupak dodjele zvanja *professor emeritus* dostavljanjem obrazloženog prijedloga Senatu Univerziteta.

(2) Prijedlog iz stava (1) ovog člana podnosi se Senatu Univerziteta, najkasnije do početka ljetnjeg semestra akademske godine, a o kojem Senat odlučuje najkasnije do 30. septembra tekuće akademske godine.

Član 6. **(Prijedlog za dodjelu zvanja *professor emeritus*)**

Prijedlog naučno-nastavnih vijeća iz člana 5. Pravilnika, pored prethodne pismene saglasnosti rektora i prijedloga odluka sadrži:

- saglasnost predloženog kandidata,
- biografiju s bibliografijom kandidata,
- obrazloženje posebnih zasluga predloženog kandidata u skladu s članom 2. stav (3) Pravilnika.

Član 7.
(Komisija)

(1) Po prijemu prijedloga fakulteta Senat imenuje komisiju, od najmanje tri člana iz reda redovnih profesora iz iste naučne oblasti, od kojih većina članova mora biti izvan fakulteta koji je podnio prijedlog.

(2) Komisija iz stava (1) ovog člana vrši ocjenu prispjelih prijedloga, njihove potpunosti i usaglašenosti sa zahtjevima iz ovog Pravilnika, a koja može od predlagača zatražiti dodatnu dokumentaciju o kandidatu.

(3) Komisija podnosi pisani izvještaj, s ocjenom i svojim mišljenjem, koji potpisuju svi članovi komisije.

Član 8.
(Odluka Senata Univerziteta)

Na osnovu afirmativnog izvještaja komisije iz člana 7. ovog Pravilnika Senat donosi odluku o dodjeli počasnog zvanja *professor emeritus*, većinom glasova od ukupnog broja članova Senata Univerziteta.

Član 9.
(Promocija)

Promocija kandidata izabranih u zvanje *professor emeritus* vrši se uručivanjem odluke iz člana 8. ovog Pravilnika na svečanoj sjednici organiziranoj u povodu obilježavanja dana Univerziteta.

Član 10.
(Stupanje na snagu)

Ovaj Pravilnik stupa na snagu danom donošenja.

Broj: 01-108-702-0692/14.

Zenica, 26.02.2014. godine

Predsjedavajući Senata

Prof.dr.sc. Enes Bikić